

**ХӨРӨНГӨ ОРУУЛАЛТЫГ ХӨХИҮЛЭН ДЭМЖИХ, ХАМГААЛАХ
ТУХАЙ МОНГОЛ УЛСЫН ЗАСГИЙН ГАЗАР, БНАСАУ-ЫН
ЗАСГИЙН ГАЗАР ХООРОНДЫН ХЭЛЭЛЦЭЭР**

Монгол Улсын Засгийн Газар, БНАСАУ-ын Засгийн Газар (цаашид Хэлэлцэн тохирогч Талууд гэнэ),

Эдийн засгийн хамтын ажиллагааг хоёр улсын харилцан ашиг сонирхолд нийцүүлэн эрчимжүүлэхийг хүсч,

Хэлэлцэн тохирогч нэг Талын хөрөнгө оруулагчаас Хэлэлцэн Тохирогч нөгөө Талын нутаг дэвсгэрт хөрөнгө оруулах тааламжтай нөхцөл бүрдүүлэхийг эрмэлзэж,

Хэлэлцэн тохирогч Талуудын эдийн засгийн хөгжил цэцэглэлтийг урагшлуулах зорилгоор хөрөнгө оруулалтыг дэмжих, хамгаалах шаардлагатайг хүлээн зөвшөөрч,

Хөрөнгө оруулалт, эдийн засгийн хамтын ажиллагааг бүрэн эрхт байдал, тэгш эрх, харилцан ашигтай байх, харилцан хүндэтгэх, харилцан итгэлцэхийн зарчимд нийцүүлэн хөхиүлэн дэмжиж, бэхжүүлнэ гэдэгт итгэн,

Дор дурдсан зүйлийг хэлэлцэн тохиров :

**1 дүгээр зүйл
ТОДОРХОЙЛОЛТ**

Энэхүү хэлэлцээрт:

1. “Хөрөнгө оруулалт” гэдэгт Хэлэлцэн тохирогч нэг Талын хөрөнгө оруулагчаас Хэлэлцэн тохирогч нөгөө Талын нутаг дэвсгэрт түүний хууль тогтоомжийн дагуу оруулсан аливаа төрлийн эд хөрөнгө хамаарах бөгөөд түүний дотор дор дурдсанаар үл хязгаарлагдана:

1) Хөдлөх ба үл хөдлөх хөрөнгө, түүний дотор үл хөдлөх эд хөрөнгийн барьцаа, дэнчин зэрэг эд хөрөнгийн бусад эрхүүд,

2) хувьцаа, үнэт цаас, өрийн бичиг буюу компанид хувь нийлүүлэх бусад хэлбэр,

3) мөнгөн төлбөр болон эдийн засгийн үнэлэмж бүхий аливаа ажиллагааг биелүүлэхтэй холбогдсон шаардах эрх,

4) Оюуны өмчийн эрх , патент ,барааны тэмдэг, ноу-хау, технологийн ажилбар, пүүсийн нэр хүнд,

5) Бизнесийн түрээсийн эрх, бүтээгдэхүүн үйлдвэрлэх, байгалийн нөөцийн эрэл хайгуул хийх, худалдах, ашиглах, олборлохыг оролцуулан эдийн засгийн үйл ажиллагаагаар болон хууль, гэрээгээр олгогдсон эдийн засгийн үнэлэмж бүх эрхүүд,

6) гадаадын валют худалдан авах, худалдах, сан өсгөх, өмчийн эрх борлуулах, шалгуулах бизнесийн үйл ажиллагаа, байгууллага, үйлдвэрлэлийг хангах, эзэмших зэрэг хөрөнгө оруулалттай холбогдох үйл ажиллагаа,

Хөрөнгө оруулалт хийсэн хөрөнгийн хэлбэрийн өөрчлөлт нь хөрөнгө оруулалтын шинж чанарт нөлөөлөхгүй.

2. "Хөрөнгө оруулагч" гэж дор дурдсаныг хэлнэ:

1) Хэлэлцэн тохирогч аль нэг Талын хууль тогтоомжийн дагуу уг Талын иргэн буюу байнга оршин суугч хувь хүн,

2) Хэлэлцэн тохирогч аль нэг Талын хүчин төгөлдөр хууль тогтоомжийн дагуу зохих ёсоор байгуулагдсан, эдийн засгийн бодит үйл ажиллагаа явуулж буй Хэлэлцэн тохирогч аль нэг Талын нутаг дэвсгэрт байрлалтай эдийн засгийн холбоо, компани болон байгууллага зэрэг хуулийн этгээд.

3. "Орлого" гэж хөрөнгө оруулалтын үр дүнд олсон санхүүгийн орлого, түүний дотор ашиг, ногдол ашиг, хүү, хөрөнгийн өсөлт, түрээсийн төлбөр, оюуны өмчийн эрхэд хамаарах төлбөр болон бусад хууль ёсны орлогыг хэлнэ.

4. "Нутаг дэвсгэр" гэж

1) Монгол Улсын хувьд Монгол Улсын бүрэн эрхт байдал буюу шүүн таслах эрх мэдэл үйлчлэх нутаг дэвсгэрийг хэлнэ.

2) БНАСАУ-ын хувьд дотоодын болон олон улсын эрх зүйн дагуу БНАСАУ-ын Улсын бүрэн эрхт байдал буюу шүүн таслах эрх мэдэл үйлчлэх нутаг дэвсгэр, дотоодын ус, агаарын орон зай, эх газрын хормой, тэнгисийн тусгай бүсийг хэлнэ.

2 дугаар зүйл ХӨРӨНГӨ ОРУУЛАЛТЫГ ДЭМЖИХ БОЛОН ХАМГААЛАХ

1. Хэлэлцэн тохирогч Тал бүр өөрийн нутаг дэвсгэр дэх Хэлэлцэн тохирогч нөгөө Талын хөрөнгө оруулагчийн хөрөнгө оруулалтыг хөхиүлэн дэмжиж, өөрийн хууль тогтоомжийн дагуу зөвшөөрнө.

2. Хэлэлцэн тохирогч Тал бүр Хэлэлцэн тохирогч аль нэг Талын нутаг дэвсгэрт хууль тогтоомжийн дагуу хөрөнгө оруулалттай холбогдох үйл ажиллагаа явуулж буй Хэлэлцэн тохирогч нөгөө Талын иргэдэд ажиллах зөвшөөрөл, виз авах нөхцөл боломжийг хангаж, тусламж үзүүлнэ.

3. Хэлэлцэн тохирогч аль ч Талын хөрөнгө оруулагчдын хөрөнгө оруулалт нь Хэлэлцэн тохирогч нөгөө Талын нутаг дэвсгэрт урт хугацааны хамгаалалт, аюулгүй байдлын нөхцлөөр хангагдана.

4. Хууль тогтоомжид өөрөөр заагаагүй бол Хэлэлцэн тохирогч Тал бүр Хэлэлцэн тохирогч нөгөө Талын хөрөнгө оруулагчдад хөрөнгөө захиран зарцуулах, ашиглах, үйлчилгээ, удирдлагаар хангахад нь шудрага бус, ялгаварлан үзэх арга хэмжээ авахгүй.

3 дугаар зүйл ХӨРӨНГӨ ОРУУЛАЛТЫН НӨХЦӨЛ

1. Хэлэлцэн тохирогч аль нэг Тал нутаг дэвсгэр дээрээ Хэлэлцэн тохирогч нөгөө Талын хөрөнгө оруулагчаас оруулсан хөрөнгө оруулалт, орлого, хөрөнгө оруулалттай холбогдох үйл ажиллагаанд харилцан адил тааламжтай нөхцлийг олгоно.

Энэхүү нөхцөл нь гуравдагч орны хөрөнгө оруулагчид олгодогос дутуугүй тааламжтай байна.

2. Хэлэлцэн тохирогч аль ч Тал өөрийн нутаг дэвсгэр дээрх Хэлэлцэн тохирогч нөгөө Талын хөрөнгө оруулагчдад хөрөнгө оруулалтаа захиран зарцуулах, ашиглах, үйлчилгээ, удирдлагаар хангахад нь дотоодын болон аливаа гуравдагч орны хөрөнгө оруулагчдад олгодогос дутуугүй, харилцан адил тааламжтай нөхцөл олгоно.

3. Энэ зүйлийн 1, 2 дахь заалтад дурдсан нөхцөл хамгаалалт нь Хэлэлцэн тохирогч аль нэг Тал гаалийн холбоо, чөлөөт худалдааны бүсийн гишүүн эсвэл гишүүнээр элсэх, түүнчлэн аль нэг тал нь бусад улстай Давхар татвараас чөлөөлөх тухай хэлэлцээр байгуулах зэргээс үүдэн аливаа гуравдагч орны хөрөнгө оруулагч эдэлж болох илүү ашигтай, давуу эрхэд хамаарахгүй.

4 дүгээр зүйл ХӨРӨНГИЙГ АЛБАДАН ХУРААХ БА НӨХӨН ТӨЛБӨР ХИЙХ

1. Хэлэлцэн тохирогч аль ч Тал Хэлэлцэн тохирогч нөгөө Талын хөрөнгө оруулагчаас тухайн Талын нутаг дэвсгэрт оруулсан хөрөнгийг албадан хураах, улсын өмчид авах буюу албадан хураах, улсын өмчид авахтай адилтгах аливаа арга хэмжээг нийтийн эрх ашгийн үүднээс, ялгаварлан гадуурхахгүй байх зарчмын үндсэн дээр, хууль тогтоомжийн дагуу тухайн хөрөнгөд нийцэхүйц болон үр ашигтай нөхөн төлбөр хийхээс бусад тохиолдолд авч хэрэгжүүлж болохгүй.

Энэхүү нөхөн төлбөрийн хэмжээ тухайн хөрөнгийг албадан хураасан эсхүл албадан хураах тухай мэдээ нийтийн хүртээл болсны урьдах хугацааны зах зээлийн бодит үнэтэй тэнцүү байх бөгөөд нөхөн төлбөр чөлөөтэй хөрвөх валютаар, тухайн Талын нутаг дэвсгэрт мөрдөгдөж буй

худалдааны хүүний ханшаар бодсон хүүгийн хамт даруй, саадгүй хийгдэх ёстой.

2. Хэлэлцэн тохирогч аль нэг Талын хөрөнгө оруулагч түүний хөрөнгө оруулалтыг бүхэлд нь буюу хэсэгчлэн албадан хураасан, улсын өмчид авсан тохиолдолд албадан хураасан үйл ажиллагааны шалтгаан болон хөрөнгийн дахин үнэлгээг хийлгэхээр нөгөө талын бие даасан хуулийн болон захиргааны байгууллагад хандах эрх эдлэнэ.

5 дугаар зүйл ХОХИРЛЫГ НӨХӨН ТӨЛӨХ

Хэлэлцэн тохирогч аль нэг Талын хөрөнгө оруулагчаас Хэлэлцэн тохирогч нөгөө Талын нутаг дэвсгэрт оруулсан хөрөнгөд дайн, зэвсэгт мөргөлдөөн, хувьсгал, бослого, үймээн, бүх нийтийг хамарсан эмх замбараагүй байдал, үндэсний онц байдал зарласны болон эдгээртэй адил үйл ажиллагааны улмаас хохирол учирахад хүрвэл Хэлэлцэн тохирогч сүүлчийн Тал нь хохирлыг бүрэн арилгах буюу нөхөн төлбөрийг эхний байдлаар эсвэл өөр хэлбэрээр хийх бөгөөд энэ нөхөн төлбөр хийх нөхцөл нь гуравдагч орны болон дотоодын хөрөнгө оруулагчдад олгодогдоос дутуугүй байна.

Бүх төлбөр нь чирэгдэлгүй, бүрэн, чөлөөтэй хийгдэнэ.

6 дугаар зүйл ХӨРӨНГӨ БОЛОН ОРЛОГЫГ ШИЛЖҮҮЛЭХ

1. Хэлэлцэн тохирогч аль ч Тал өөрийн нутаг дэвсгэр дэх Хэлэлцэн тохирогч нөгөө Талын хөрөнгө оруулагчдын хөрөнгө оруулалт болон орлогыг дотоодын хууль тогтоомжийн дагуу дараах хэлбэрээр шилжүүлэхийг зөвшөөрнө:

- 1) Ашиг, хүү, ногдол ашиг болон хууль ёсны бусад орлого,
 - 2) Хөрөнгө оруулалтыг бүрэн буюу хэсэгчлэн худалдсанаас болон эсхүл татан буулгаснаас олсон орлого,
 - 3) Хөрөнгө оруулалттай холбоотой зээлийн гэрээний дагуу хийсэн төлбөр,
 - 4) Энэхүү Хэлэлцээрийн 1 дүгээр зүйлийн 1.4 заалтад дурдсан эрхийг хэрэгжүүлсэнтэй холбогдох төлбөр,
 - 5) Хөрөнгө оруулалттай холбогдох ажил үйлчилгээний төлөө авсан гадаад улсын иргэдийн цалин болон хууль ёсны орлого,
2. Энэхүү зүйлийн 1-д дурдсан төлбөрийн шилжүүлгийг тухайн өдрийн нийтийн ханшаар хойшлуулшгүй гүйцэтгэнэ.

7 дугаар зүйл ЭРХ ШИЛЖИХ

Хэлэлцэн тохирогч аль нэг Тал буюу түүний байгууллага нөгөө Талын нутаг дэвсгэрт хийсэн өөрийн хөрөнгө оруулагчийн хөрөнгө оруулалтад баталгааны дагуу төлбөр хийсэн тохиолдолд Хэлэлцэн тохирогч нөгөө Тал хөрөнгө оруулагчийн аливаа эрх, шаардах эрхийг Хэлэлцэн тохирогч эхний Тал болон түүний байгууллагад шилжсэнийг хүлээн зөвшөөрөхийн хамт энэхүү Тал болон байгууллага эдгээр эрхийг эдлэхээр хүлээн авч байгааг мөн зөвшөөрнө.

Ийнхүү шилжсэн эрх, шаардах эрх нь хөрөнгө оруулагчийн анхны эрх, шаардах эрхээс илүүгүй байна.

8 дугаар зүйл ХЭЛЭЛЦЭН ТОХИРОГЧ ТАЛУУДЫН ХООРОНДЫН МАРГААНЫГ ШИЙДВЭРЛЭХ

1. Хэлэлцэн тохирогч Талуудын хооронд үүссэн энэхүү Хэлэлцээртэй холбогдох аливаа маргааныг аль болох дипломат шугамаар зөвлөлдөх үндсэн дээр шийдвэрлэнэ.

2. Хэрэв Хэлэлцэн тохирогч Талууд маргаан үүссэнээс хойш зургаан сарын дотор шийдвэрлэж чадаагүй тохиолдолд Хэлэлцэн тохирогч аль нэг Талын хүсэлтээр дор дурдсан журмаар байгуулагдах 3 гишүүнтэй Арбитрын шүүхэд маргааныг шилжүүлнэ.

1) Арбитрын шүүх хүсэлтийг хүлээн авсанаас хойш 60 хоногийн дотор Хэлэлцэн тохирогч Тал тус бүр өөрийн талын арбитрчийг сонгох бөгөөд сонгогдсон хоёр арбитрч нь томилогдсон өдрөөс хойш 60 хоногийн дотор эсхүл тохиролцооны дагуу Хэлэлцэн тохирогч хоёр Талтай дипломат харилцаатай гуравдагч орны нэг иргэнийг нэр дэвшүүлнэ.

2) Гуравдагч арбитрчийг томилсоноос хойш 60 хоногийн дотор Хэлэлцэн тохирогч Талууд түүнийг Арбитрын шүүхийн дарга хэмээн хүлээн зөвшөөрнө.

3. Хэрэв энэ зүйлийн 2 дахь хэсэгт тодорхой заасан хугацаанд шаардлагатай томилолт болон хүлээн зөвшөөрөх асуудал зохих ёсоор хийгдээгүй бол Хэлэлцэн тохирогч Талууд Олон Улсын Шүүхийн Ерөнхийлөгчид холбогдох томилолт хийлгүүлэх талаар хүсэлт гаргана.

Хэрэв Олон Улсын Шүүхийн Ерөнхийлөгч нь Хэлэлцэн тохирогч аль нэг Талын иргэн эсхүл дээрх үүргийг өөр ямар нэгэн шалтгаанаар гүйцэтгэж чадахгүй бол шаардагдах гишүүдийг томилох зорилгоор Дэд Ерөнхийлөгчийг урина.

Хэрэв Дэд Ерөнхийлөгч нь Хэлэлцэн тохирогч аль нэг Талын иргэн эсхүл дээрх үүргийг гүйцэтгэж чадахгүй бол шаардагдах гишүүдийг томилох

зорилгоор Хэлэлцэн тохирогч аль нэг Талын иргэн бус Олон Улсын Шүүхийн Дэд Ерөнхийлөгчийн дараах ахлах албан тушаалтныг урина.

4. Арбитрийн шүүх энэхүү Хэлэлцээр буюу Хэлэлцэн тохирогч Талуудын хоорондын бусад хэлэлцээрийн дагуу, олон улсын эрх зүйн давамгайлах зарчмуудын үндсэн дээр ажиллана.

Арбитрийн шүүх олонхийн саналаар шийдвэрээ гаргана.

Арбитрийн шүүхийн шийдвэр эцсийнх бөгөөд Хэлэлцэн тохирогч Талууд заавал биелүүлэх үүрэг хүлээнэ.

5. Хэлэлцэн тохирогч Тал бүр арбитрын шүүхэд оролцсон оролцоо буюу өөрсдийн арбитражтай холбогдон гарсан зардлыг төлөх үүрэгтэй.

Шүүхийн даргын буюу бусад зардлыг Хэлэлцэн тохирогч Талууд адил хэмжээгээр хариуцан төлнө.

9 дүгээр зүйл

ХЭЛЭЛЦЭН ТОХИРОГЧ НЭГ ТАЛЫН ХӨРӨНГӨ ОРУУЛАГЧ, ХЭЛЭЛЦЭН ТОХИРОГЧ НӨГӨӨ ТАЛЫН ХООРОНДЫН МАРГААНЫГ ШИЙДВЭРЛЭХ

1. Хэлэлцэн тохирогч аль нэг Талын хөрөнгө оруулагч, Хэлэлцэн тохирогч нөгөө Талын хоорондын хөрөнгө оруулалттай холбоотой аливаа маргааныг яриа хэлэлцээрийн замаар аль болох эв зүйгээр шийдвэрлэнэ.

2. Хэрэв маргааныг шийдвэрлэх талаар хүсэлт гаргасан өдрөөс хойш 6 сарын хугацаанд уг маргааныг эв зүйгээр шийдвэрлэж чадаагүй тохиолдолд хөрөнгө оруулагч дараах эрх бүхий байгууллагад асуудлаа шилжүүлэх эрхтэй:

1) Хөрөнгө оруулалт нутаг дэвсгэрт нь хийгдсэн Хэлэлцэн тохирогч Талын захиргааны байгууллага, эсхүл эрх бүхий шүүх,

2) Олон Улсын худалдааны эрх зүйн НҮБ-н Комисс "ЮНСИТРАЛ"-ын Арбитрын дүрмийн дагуу байгуулагдсан арбитрийн түр шүүх.

3. Арбитрийн түр шүүх нь шийдвэрээ олонхийн саналаар гаргана. Гаргасан шийдвэр нь эцсийн бөгөөд маргалдагч талууд заавал даган мөрдөнө. Хэлэлцэн тохирогч Тал бүр шийдвэрийг биелүүлэх үүрэгтэй.

4. Маргалдагч талууд өөрийн талын арбитраж, арбитрийн үйл ажиллагаанд оролцсон өөрийн төлөөлөгчтэй холбогдон гарсан зардлыг хариуцана.

Шүүхийн даргын буюу бусад зардлыг маргалдагч талууд адил хэмжээгээр хариуцан төлнө. Шүүхийн шийдвэр гарах үед арбитрийн шүүх маргалдагч аль нэг талаар нөгөө талын төлөхөөс харьцангуй их зардлыг төлөхийг санал болгож болно.

**10 дугаар зүйл
БУСАД ЖУРМЫГ ХЭРЭГЛЭХ**

Хэрэв Хэлэлцэн тохирогч аль нэг Талын хууль тогтоомжийн заалтууд, эсхүл Хэлэлцэн тохирогч Талуудын хооронд байгуулагдсан буюу цаашид байгуулагдах олон улсын хэлэлцээрийн заалтууд нь Хэлэлцэн тохирогч хоёр Талын хөрөнгө оруулалтанд энэхүү хэлэлцээрээр олгосноос илүү тааламжтай нөхцлийг үзүүлэх заалтыг агуулсан бол тэдгээр заалтуудыг энэхүү хэлэлцээр хөндөхгүй бөгөөд илүү тааламжтай нөхцлийг нь эдлэнэ.

**11 дүгээр зүйл
ЗӨВШИЛЦӨХ, НЭМЭЛТ, ӨӨРЧЛӨЛТ ОРУУЛАХ**

1. Хэлэлцэн тохирогч аль нэг Тал Хэлэлцэн тохирогч нөгөө Талдаа энэхүү Хэлэлцээрийг хэрэгжүүлэхтэй холбогдсон аливаа асуудлаар зөвлөлгөөн хийхийг санал болгож болох бөгөөд уг зөвлөлгөөнийг хийх газар, хугацааг Хэлэлцэн тохирогч аль нэг Талын хүсэлтээр дипломат шугамаар тохиролцоно.

2. Хэлэлцэн тохирогч хоёр Тал шаардлагатай тохиолдолд харилцан тохиролцсоны үндсэн дээр энэ хэлэлцээрт хавсралт, нэмэлт, өөрчлөлт оруулж болно.

**12 дугаар зүйл
ХЭЛЭЛЦЭЭРИЙГ ХЭРЭГЛЭХ**

Энэхүү Хэлэлцээрийн заалтууд нь Хэлэлцэн тохирогч аль нэг Талын хөрөнгө оруулагчаас Хэлэлцэн тохирогч нөгөө Талын нутаг дэвсгэрт түүний хууль тогтоомжийн дагуу тус Хэлэлцээр хүчин төгөлдөр болохоос өмнө болон хойно оруулсан бүх хөрөнгө оруулалтад хамаарна.

Энэхүү Хэлэлцээрийг түүнийг хүчин төгөлдөр болохоос өмнө гарсан хөрөнгө оруулалтын талаарх маргаан буюу санал зөрөлдөөнд хэрэглэхгүй.

**13 дугаар зүйл
ХЭЛЭЛЦЭЭР ХҮЧИН ТӨГӨЛДӨР БОЛОХ, ХҮЧИНТЭЙ БАЙХ ХУГАЦАА,
ТҮҮНИЙГ ЦУЦЛАХ**

1. Энэхүү Хэлэлцээр нь Хэлэлцэн тохирогч Талууд түүнийг хүчин төгөлдөр болгох асуудлаарх дотоодын хууль тогтоомжийн шаардлагыг биелүүлсэн тухайгаа харилцан бичгээр мэдэгдсэний дараагийн сарын эхний өдөр хүчин төгөлдөр болох бөгөөд 10 жилийн хугацаанд хүчин төгөлдөр байна.

2. Энэхүү зүйлийн 1-д дурдсан хүчин төгөлдөр байх хугацаа дуусахаас 1 жилийн өмнө Хэлэлцэн тохирогч аль нэг Тал Хэлэлцээрийг цуцлах тухайгаа Хэлэлцэн тохирогч нөгөө Талдаа бичгээр мэдэгдээгүй тохиолдолд

Хэлэлцээрийн хүчинтэй байх хугацаа дараа дараагийн 10 жилд тутамд аяндаа сунгагдана.

3. Хэлэлцээрийн хүчинтэй байх эхний 10 жилийн хугацаа дууссаны дараа Хэлэлцэн тохирогч Талууд түүнийг дуртай цагтаа цуцлах эрхтэй бөгөөд энэ тухайгаа нөгөө Талдаа бичгээр 1 жилийн өмнө мэдэгдэнэ.

4. Энэхүү Хэлэлцээрийн 1-13 зүйлийн заалтууд хэлэлцээрийг цуцлахаас өмнө оруулсан хөрөнгө оруулалтын хувьд түүнийг цуцалсанаас хойш 10 жилийн хугацаанд хэвээр үргэлжлэн мөрдөгдөнө.

Өөрсдийн Засгийн газраас эрх олгосон төлөөлөгчид энэ хэлэлцээрт гарын үсэг зурав.

Энэхүү Хэлэлцээрт 2003 (Жуче-ийн 92) оны 11 дугаар сарын 19 өдөр *Пхеньян*..... хотноо монгол, солонгос, англи хэлээр тус бүр хоёр хувь үйлдсэн бөгөөд эх бичвэрүүд адил хүчинтэй байна.

Хэлэлцээрийг тайлбарлах явцад санал зөрвөл англи хэлээрх эх бичвэрийг баримтална.

МОНГОЛ УЛСЫН
ЗАСГИЙН ГАЗРЫГ
ТӨЛӨӨЛЖ



БҮГД НАЙРАМДАХ АРДЧИЛСАН
СОЛОНГОС АРД УЛСЫН ЗАСГИЙН
ГАЗРЫГ ТӨЛӨӨЛЖ

ЦАХИМ

ТАЛДААД ХАРИЛЦАДАНЫ ТӨВ АРХИВ